



## INATSISARTUNI

Partii Inuit  
Randi Broberg

UPA 2014/51-1  
28.5.2014

**PILLUGU: Kommunini politikkimi nunalu tamakkerlugu politikkimi angutit arnallu naligiinnerusumik sinniisoqalernissaat siumut isigaluni qanoq qulakkeerniarsinnaaneripput pillugu apeqquteqaat aallaavigalugu oqallittoqarnissaanik siunnersuut.**

(Inatsisartunut ilaasortaq Naaja H. Nathanielsen, Inuit Ataqatigiit)

Oqallisissiakktu eqqartuiginiarneqarpoq, nunap immikkoortuini ingerlatseqatigiiffiit siulersuisuini, taamalu Inatsisartuni arnat angutillu sinniisoqarnermikkut naligiinnerunissaat qanoq qulakkeersimaneqarsinnaanersoq. Ilaatigut arnat akuunerunissaannut aporfisartagaasa erseqqissarniarnerisigut.

Naalackersuisut akissuteqaataat naapertorlugu, immikkut maluginiagassatut taaneqartut tassaapput, siulersuisuni, suleqatigiissitani assigisaannilu oqartussaaffimmik tigungminnittunit toqqaanikkut inuttalersuisarnerisa kiisalu innuttaasut qineqqusaartunik taasinnermikkut toqqaasarnerisa immikkooruteqarneri.

Partii Inuit apeqqut qaqinneqartoq annertuutut isigaarput, taamalu inerititaqarfiusumik paaseqatigiiffiusumillu eqqartuiffisinnaassagaanni, erseqqissaqqaagassat arlaqarsoraagut:

- 1) Oqallinnermi siunertaq erseqqereerpoq; tassalu arnat angutillu sinniisoqarnermikkut naligiinnerunissaat qanoq aqqutissiuunneqarsinnaanersoq.
- 2) Apeqqummi pineqartumi siumoortumik paasinninnerup tunuliaqutai; tassalu ullumikkumut misilittakkat ilisimasallu tunngavigalugit, qinikkani angutit sinniisoqarnerunerinut pissutsit suut aaliangiisuusutut isigineqarnerisut erseqqissartariaqarpoq. Siumoortumik paasinninneq atorineqartoq amerlanertigut oqaasinngortinneqarsimaneq ajorpoq, taamalu eqqumaffigineqaranilu apeqquserneqarsimaneq ajorluni.

Taamaattumik uani oqallinnermissaaq pingaartissavarput, apeqqummi pineqartumi siumoortumik paasinninnerit sapinngisamik apeqqusersorneqarnissaat. Tassuunakkut apeqqummut siumoortumik paasinninnermut tunuliaqutaasut erseqqissarneqarnissaat ilinniarsiunissaallu anguniarlugit.

Ima paasinagu allat siumoortumik paasinninnerannik nakkarsaasoqassasoq, kisiannili siumoortumik paasinninnerit atorineqartut oqaasinngortinnissaat eqqumaffigineqarnissaallu siunertaralugu apeqqusersuinertut.



## INATSISARTUNI

Siunnersuuteqartup oqaaseqatigiit atugai naapertorlugit, Partii Inuit naliliinerput naapertorlugu, siumoortumik paasinnineq saqqummiunneqartoq ilaatigut ima imaqartoq;

- inuiaqatigiit iluini naalackersuinnikkut pissaanermik agguataarinerup oqimaaqatigiinniginnera peqqutaaqataasoq. Allatut oqaatigalugu inuiaqatigiinnik sukaterinerup kingunerisaanik qinikkat akornanni arnat sinniisoqannginnerusut,
- arnat avatangiisaat, tassalu inuiaqatigiinni pissutsit, pingaartumillu qinikkatut sulinermi atugassarititaasut, qinikkat akornanni arnat sinniisoqannginnerunerannut peqqutaaqataasut,
- allatut oqaatigalugu Partii Inuit paasinninnerput unaavoq, siunnersuutikkut ilaatigut ersersinneqartoq - arnat suunerinik paasinnineq.

Oqarutta inuiaqatigiinnik sukaterinitta kingunerisaanik qinikkat akornanni arnat sinniisoqannginnerusut, taava aamma minnerusumik annerusumilluunniit isumaqarsimassaagut, inuiaqatigiinni sukaterinerput peqqutaalluni arnat *eqqukkatut* inissisimasut, taamalu inuiaqatigiinni pissutsit peqqutigalugit qinikkatigut sinniisoqannginnerusut.

3) Qinikkat akornanni arnat akuunnginnerunerat pillugu nalilersuivigisariaqakkat annikinngillat, taamaattumillu oqallisissiatut siunnersuut annertuujusoq oqaatigereerparput. Tassami apeqqut ilumoorullugu eqqartuiffigalutigulu nalilersuivigisinnaassagutsigu, qaqileriffigisassat erseqqissaqqaagassallu arlaqarput;

- qinikkat akornanni arnat akuunnginnerunerinut suut ilisarnaataasutut taaneqarsinnaappat?
  - nalinginnaasumik arnat meeqperillaqqinnerusutut perorsaallaqqinnerusutullu isiginiarneqartarput. Soorlu eqqartuussiveqarnikkut, inunnik isumaginninnikkut, inuillu akornanni,
  - nalinginnaasumik arnat angerlarsimaffimmik ingerlatsillaqqinnerusutut isiginiarneqartarput,
  - meerartaarnermut atasumik sulinnigiffeqarnissamut periarfissaq, nalinginnaasumik arnanit atorneqarneruvoq,
  - sulisitsut angutinik sulisoqarusunnerupput, sulisutut arnat tutsuviginannginnerusutut akisunerusutullu isigineqaqqajaasarlutik.



## INATSISARTUNI

Annermik arnat naartunermut meerartaarnermullu atasumik sulinngiffeqartarnerat peqqutigalugu,

- qinikkat akornanni arnat akuunnginnerunerannut peqqutaasutut paasinnittaaseq atorpeqartoq suua imal. suusinnaappat?
  - qinikkat akornanni arnat akuunnginnerunerannut arnat tarnikkut qanoq issusaannit aallaaveqarpa? Tassani arnanik perorsariaaseq, arnatut misilittakkat, taamalu arnatut qanoq avatangiisinit nalilersorneqarnissamik pineqarnissamillu naatsersuutit pineqarlutik. Tarnikkut atukkat peqqutaasutut isigigutsigit, aaqqiissutissaq tassaassaaq oqaloqatiginninnikkut katsorsaaneq.
  - qinikkat akornanni arnat akuunnginnerunerannut, inuiaqatigiit iluini arnat angutillu pissaaneqarniunnerat peqqutaava? Taamaappat arnat akuunnginnerunerinut peqqutaatinneqassaaq, inuiaqatigiinnik sukaterinermi arnat pisinnaatitaaffikinnerusut imal. isummersornissaminnut angutinit periarfissakinnerutinneqartut,
  - qinikkat akornanni arnat akuunnginnerunerat, inuiattut inuiaqatigiittullu perorsaannermit kingornussaappat? Taamaappat inuttut paasinnittaatsit pissusilersuutillu allanngortinniarlugit suliniuteqartoqarnissaa ujartortariaqassalluni,
  - qinikkat akornanni arnat akuunnginnerunerat naqisimanninnermik aallaaveqarpat? Taava oqaloqatiginninneq aqqutigalugu arnat sutigut naqisimaneqarnertik pillugu nalilersuisinnaanngornissaat anguniartariaqassaaq – namminneq iliuseqarnermikkut allannguisinnaanngortinniarlugit,
  - imaluunniit qinikkat akornanni arnat akuunnginnerunerannut peqqutaasut taakkuuppat, uagut nammineq oqaasinngortitsinitsigit piviusutut isigisagut? Tassa arnat akuunnginnerunerannut peqqutitut taasinnaasagut suugaluarpata, itinerusumik eqqartueqatigiiffiginerunerisigit nutaamik nalilersuinikkut ingerlaqqinnissamik ujartuineq. Soorlu massakut tama siunertaqartumik oqallinneq ingerlakkippat,
  - kiisalu ilisimatusarnikkut, misilittakkatigut nalunaarsukkat suut pigineqarpat, taakkulu ilisimasat paasinnittaatsit suut atorlugit nalilersuippat? Tassuunakkut oqallinneq, isummersorneq nalilersuinerlu sumik tunngaveqarpiarnersoq takusinnaassagutsigu.



## INATSISARTUNI

Qulaani taasagut tunngavigalugit, Partii Inuit matumuuna kaammattuutigissavarput, una oqallisissiaq soqutiginarloq inerititaqarfiuneroqqullugu, taamalu toqqammaveqarnerusumik nalilersueqatigiinnissaq anguniarlugu inuiaqatigiinni aamma oqallisigineqarnissaa, kiisalu naligiissitaaneq pillugu siunnersoisooqatigiinnit aamma sukumiinerusumik iliuseqarfigineqarnissaanik tikkuussiniartoqaqqullugu.

Taama oqaaseqaateqarluta oqallisissiamut qujanaq.